

【七種不淨】（科註第九二八頁第八行）

《三藏法數》：「出天台四教儀集註」

謂修行之人，恐於自他身分，而起貪著，妨於正道，故令假作此不淨之想，破其著心。故有七種也。

一、種子不淨：種子有二：一內種，謂人之身，從昔煩惱業因而生。二外種，謂此身受父母遺體而生，故名種子不淨。  
二、受生不淨：謂人之生，父母交媾（音夠），赤白和合，以成其身，故名受生不淨。

三、住處不淨：謂女人之體，是不淨聚，處胎十月，居生熟二臟之間，故名住處不淨。（生熟二藏者，謂初受飲食為生，飲食變壞為熟也。）

四、食噉不淨（噉：音但，吃也）：謂處於胎中，唯食母血以資其身，故名食噉不淨。

五、初生不淨：謂十月滿足，頭向產門，流血淋漓，腥穢狼籍（散亂），故名初生不淨。

六、舉體不淨：謂此身薄皮所覆，從頭至足，純是穢物，故名舉體不淨。

七、究竟不淨：謂業盡報終，捐棄塚間，如朽敗木；大小不淨，流溢於外，胖脹爛壞，骨肉縱橫，故名究竟不淨。（大小者，如以身為大，四肢為小之類也。）